



Rabu, 04 Desember 2024
Ogen: Maleaki 3: 6-12



"Kam Sangap"



Penting kal kita rusur nge-cek uga cara rukurta. Megati cara rukur manusia ibabai pengidah, pemegi ras penggejapen si rehna arah darat dirina nari. Cara rukur si rusur jadi e me erpengakap maka ulin geluh kalak si deban asangken dirina. Rumput tetangga selalu tampak lebih hijau. Lit sada ilustrasi kerna botol si launa enggo iinem la seh keru. Menurutndu botol ndai kai gelarna? Botol setengah kosong ntah botol setengah risi? Adi reh nindu maka botol e setengah kosong, em tandana megati dengan cara rukurta ngidah kekurangan. Tapi adi reh nindu botol e gelarna setengah erisi, selamat kam nggo mulai rukur alu cara si ngidah kelebihan asangken kekurangan.

Rusur kal si akap la sangap man banta, erdandanken cara rukur si ngenin ku bas kekurangan. Bangsa Israel selaku bangsa Tuhan, seh buena kekurangenna. Tapi la kap e nen Dibata, la talu keleng ate Tuhan i bas perhanen manusia. Kitab Maleaki enda mereken pengarapen ras pengangkan si mbages kerna pasu-pasu Tuhan man bangsaNa, man anakNa. Amin gia i bas pengakap bangsa e, enggo kena ukum ia erkiteken bangsaNa la malang man Tuhan. Tapi man sisa-sisa Israel si tetap erkemalangen man Tuhan, idilo Tuhan tetap nggeluh ersada ras Ia, dengen ndalanken peratenna. Nehken persembahen persepuluhen. Isuruh Tuhan e man bangsa Israel, dengen ibabana ku rumah pertoton tanda bangsaNa e, patuh ras nggit ndalanken kai singena ate Dibata. Tuhan la mobah, ia tetap erdilo man singgit robah. Pendilo Tuhan e guna nehken padanNa e me Janji Berkat dan pemulihan. Kalak si ngaloken janji e kap kalak si sangap.

Kekelengen Tuhan, sangaplah siakap ula ngenen ku bas kai si la lit i bas kita, tapi ergaken pendilo Tuhan ras pemereNa, keselamatanen i bas kita ras isi jabunta.